



Na osnovu člana 22 Statuta Brčko distrikta BiH - prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH na 48. redovnoj sjednici održanoj 30. juna 2011. godine, usvaja

ZAKON

O SPORTU U BRČKO DISTRIKTU BOSNE I HERCEGOVINE

DIO PRVI - OPĆE ODREDBE

Član 1 (Predmet)

Ovim zakonom propisuju se osnovni principi u sportu, organizovanje sporta, prava i obaveze pravnih i fizičkih lica u sportu, prava i obaveze sportista, stručni rad u sportu, organizovanje sportskih takmičenja i sportskih manifestacija, način osiguravanja sredstava za finansiranje sporta i druga pitanja koja se odnose na sport u Brčko distriktu Bosne i Hercegovine (u daljnjem tekstu: „Distrikt“).

Član 2 (Definicije)

Pojedini izrazi upotrijebljeni u ovom zakonu imaju sljedeće značenje:

a) **sport** obuhvata:

- 1) sportske aktivnosti i igre organizovane radi postizanja sportskih dostignuća koja se ostvaruju shodno utvrđenim pravilima kao što su: sportska takmičenja i sportske priredbe,
- 2) sportske aktivnosti i igre organizovane s ciljem unapređenja zdravlja ili rekreacije kao što su: sportska rekreacija, sport za sve,
- 3) sportske aktivnosti organizovane za invalidna lica;
- 4) školski i univerzitetski sport;

b) **sportist** je fizičko lice koje se bavi sportskim aktivnostima i to kao:

- 1) član pravnog lica koje obavlja sportsku djelatnost učestvovanja na sportskim takmičenjima,
- 2) lice koje obavlja samostalnu sportsku djelatnost učestvovanja na sportskim takmičenjima;

c) **učesnici u sportu su**: sportisti, sudije, delegati i sportski treneri;

d) **vrhunski sportist je** lice koje je na međunarodnim sportskim takmičenjima postiglo vrhunske sportske rezultate, odnosno lice koje je osvajač jedne od medalja na:

- 1) olimpijskim igrama,
- 2) svjetskom prvenstvu,
- 3) evropskom prvenstvu;

e) **sportist amater** je lice kojem zarada nije cilj bavljenja sportskim aktivnostima, ne bavi se sportom u vidu zanimanja;

f) **sport za lica s invaliditetom** je sportska aktivnost u okviru koje se licima sa invaliditetom obezbjeđuju jednake mogućnosti za organizovano bavljenje sportom i sportskom rekreacijom;

- g) **sportska rekreacija** obuhvata organizovane ili individualne sportske aktivnosti djece, omladine i odraslih građana, koje se ostvaruju u okviru različitih oblika fizičkog vježbanja i nemaju organizovane takmičarske oblike;
- h) **sportski klub** je osnovni oblik organizovanja u sportu;
- i) **amaterski sportski klub** je dobrovoljna, nevladina, neprofitna organizacija koja se osniva i registruje kao udruženje građana za obavljanje sportske djelatnosti u skladu sa Zakonom o udruženjima i fondacijama Brčko distrikta (u daljnjem tekstu: „Zakon o udruženjima“);
- j) **sportske aktivnosti** su aktivnosti koje obuhvataju fizičko vježbanje koje se odnosi na obučavanje, trening, rekreativne aktivnosti i sportske priredbe koje obuhvataju sportska takmičenja i sportske manifestacije;
- k) **nosioци sportskih aktivnosti** su pravna i fizička lica registrovana za obavljanje sportskih aktivnosti u skladu sa zakonom;
- l) **sportske djelatnosti** su djelatnosti kojima se omogućavaju sportske aktivnosti, odnosno osiguravaju uslovi za njihovo obavljanje, a naročito: obučavanje, planiranje i vođenje fizičkog vježbanja, sportsko suđenje, organizovanje sportskih priprema i takmičenja, poslovi stručnog osposobljavanja, usavršavanja i informisanja, naučnoistraživački rad, savjetodavne i stručne usluge;
- m) **sportski objekat** je višenamjenski otvoren ili zatvoren prostor namijenjen za sportske aktivnosti;
- n) **granski savez** je udruženje pravnih lica u sportu u koje se udružuju pravna lica koja obavljaju sportske djelatnosti u istom sportu, a koji radi ostvarivanja zajedničkih interesa u pojedinom sportu naročito: usklađuje aktivnosti svojih članica; organizuje, uređuje i provodi sistem takmičenja; uređuje pitanja koja se odnose na registraciju sportista, status i odgovornost sportista; promoviše stručni rad u sportu i brine se o kategorizovanim sportistima u okviru te grane sporta;
- o) **sportska pravila** su opći akti sportskih saveza, kojima se uređuje obavljanje sportskih aktivnosti i djelatnosti i ostvarivanje utvrđenih sportskih ciljeva.

Član 3 (Osnovni principi u organizaciji sporta)

Osnovni principi na kojima se organizuje sport u Distriktu odnose se na:

- a) prava i slobode sportista;
- b) pravo svih građana da se bave sportom pod jednakim uslovima bez obzira na nacionalnu, vjersku, rasnu, političku, socijalnu i spolnu pripadnost;
- c) obavezu Distrikta da materijalnom podrškom i programima razvoja stvara opće i posebne uslove za sportske aktivnosti, sportsko napredovanje i usavršavanje;
- d) autonomnost pravnog lica u sportu, koja se odnosi na utvrđivanje unutrašnjih odnosa i udruživanje;
- e) osiguravanje zdravstvene zaštite sportista i sprečavanje upotrebe nedozvoljenih stimulativnih sredstava.

Član 4 (Javni interes i ciljevi Distrikta u sportu)

(1) Sport u Distriktu je djelatnost od javnog interesa.

(2) Javni interes u sportu Distrikta ogleda se u:

- a) razvijanju svijesti građana o sportu i vrijednostima sporta;
- b) doprinosu odgoju, obrazovanju i razvoju djece i omladine;
- c) podsticanju i afirmisanju sporta i njegovih vrijednosti kao dijela kulture i ukupnih materijalnih i duhovnih vrijednosti društva;

- d) očuvanju zdravlja kao osnove ljudske aktivnosti i očuvanje radne produktivnosti;
- e) izražavanju stvaralaštva i humanog življenja;
- f) podsticanju sistematskog i organizovanog bavljenja sportom u slobodnom vremenu;
- g) prezentaciji vrhunskog sportskog stvaralaštva na svim nivoima;
- h) sistemskom stvaranju uslova za ostvarivanje vrhunskih sportskih rezultata.

Član 5 (Strategija razvoja sporta i programi razvoja)

- (1) Radi ostvarivanja javnog interesa i ciljeva u sportu Distrikta donosi se Strategija razvoja sporta u Brčko distriktu Bosne i Hercegovine (u daljnjem tekstu: „Strategija“).
- (2) Strategija se donosi za najmanje četiri godine.
- (3) Na osnovu strategije donose se programi razvoja sporta.
- (4) Strategiju donosi Skupština Brčko distrikta BiH na prijedlog Vlade Distrikta.

Član 6 (Sadržaj strategije)

Strategijom se utvrđuju:

- a) osnovna polazišta i pravci razvoja sporta;
- b) razvojni i stručni zadaci u sportu;
- c) okvirni kriteriji za vrednovanje programa i finansiranja programa u sportu;
- d) nosioci razvoja sporta i mjere kontrole realizacije razvoja sporta.

Član 7 (Međunarodna zasnovanost)

Sport u Distriktu zasniva se na načelima i standardima utvrđenim u Evropskoj povelji o sportu, Međunarodnoj konvenciji protiv dopinga u sportu, Evropskoj konvenciji o nasilju i nedoličnom ponašanju gledalaca na sportskim priredbama, Olimpijskoj povelji i pravilima međunarodnih sportskih asocijacija i drugim važećim propisima i međunarodnim dokumentima.

DIO DRUGI – ORGANIZACIJA SPORTA

GLAVA I. DUŽNOSTI NOSILACA SPORTSKIH AKTIVNOSTI

Član 8 (Nosioci sportskih aktivnosti)

- (1) Nosioci sportskih aktivnosti dužni su prilikom održavanja određene vrste i nivoa sportskog takmičenja osigurati odgovarajuće sportske objekte, sportsku opremu i rekvizite u skladu s propisima.
- (2) Vlasništvo, posjed ili korištenje sportskog objekta, sportske opreme i rekvizita dokazuje se:
 - a) ispravom u skladu sa zakonom;
 - b) ugovorom o zakupu za određeni period u kojem se obavlja sportska djelatnost.

Član 9 (Evidencije)

- (1) Odjeljenje vodi evidenciju nosilaca sportskih aktivnosti, kao i evidenciju sportskih stručnjaka, sportskih objekata i sportskih rezultata.
- (2) Nosioци sportskih aktivnosti, pored upisa u sudski registar, dužni su se upisati u evidenciju iz stava 1 ovog člana.
- (3) Pravna i fizička lica iz stava 1 ovog člana dužna su Odjeljenju prijaviti sve promjene koje su vezane za evidencije iz stava 1 ovog člana.

GLAVA II. PRAVNA LICA U SPORTU

Član 10 (Pravna lica u sportu)

Pravna lica u sportu su:

- a) sportski klub, koji može biti amaterski ili profesionalni;
- b) sportski klub invalidnih lica, koji može biti amaterski ili profesionalni;
- c) sportsko društvo;
- d) sportski savezi Distrikta u određenom sportu (u daljnjem tekstu: „granski sportski savez“);
- e) sportski savez Distrikta;
- f) udruženja sportske rekreacije.

Član 11 (Sportski klub)

- (1) Osnovni oblik organizovanja u sportu je sportski klub.
- (2) Sportski klub može obavljati sportsku aktivnost amaterski ili profesionalno.

Član 12 (Način osnivanja amaterskog sportskog kluba)

- (1) Amaterski sportski klub je dobrovoljna, nevladina, neprofitna organizacija koja se osniva i registruje, organizuje kao udruženje građana za obavljanje sportske djelatnosti u skladu sa Zakonom o udruženjima.
- (2) Amaterski sportski klub se osniva osnivačkim aktom u skladu sa Zakonom o udruženjima, Zakonom o sportu u Bosni i Hercegovini i ovim zakonom i registruje se u Osnovnom sudu Brčko distrikta Bosne i Hercegovine (u daljnjem tekstu: „Osnovni sud“).
- (3) Amaterski sportski klub mogu osnovati najmanje tri domaća fizička ili pravna lica.

Član 13 (Profesionalni sportski klub)

- (1) Profesionalni sportski klub osniva se kao pravno lice u sportu, s ciljem obavljanja sportske djelatnosti.

- (2) Profesionalni sportski klub osniva se i registruje kod Osnovnog suda Distrikta u skladu sa zakonima Distrikta.

Član 14
(Sportski klub invalidnih lica)

- (1) Radi organizovanja sportske aktivnosti invalidna lica mogu osnovati sportski klub invalidnih lica.
- (2) Sportski klub invalidnih lica može obavljati sportsku aktivnost amaterski i profesionalno.
- (3) Sportski klub iz stava 2 ovog člana registruje se u Osnovnom sudu u skladu sa zakonom.

Član 15
(Sportsko društvo)

- (1) Sportski klubovi mogu se udruživati u sportska društva radi uređivanja i ostvarivanja zajedničkih ciljeva i interesa i zajedničkog nastupanja u sportu.
- (2) Međusobni odnosi i prava sportskih klubova udruženih u sportsko društvo, regulišu se osnivačkim aktom i drugim aktima sportskog društva.
- (3) Sportsko društvo je nosilac prava korištenja zajedničkog naziva i zajedničkih simbola, ako osnivačkim i drugim aktima nije drugačije određeno.

Član 16
(Granski sportski savez Brčko distrikta Bosne i Hercegovine)

- (1) Ako na području Distrikta djeluju najmanje tri sportska kluba u istoj sportskoj disciplini, može se osnovati granski sportski savez Brčko distrikta Bosne i Hercegovine.
- (2) Granski sportski savez osniva se s ciljem:
- a) uređivanja pitanja od zajedničkog interesa;
 - b) zajedničkog reprezentovanja;
 - c) uređivanja pitanja organizovanja takmičenja i statusa sportista u odgovarajućim oblastima;
 - d) uređivanja drugih pitanja od zajedničkog interesa.
- (3) Granski sportski savez se osniva u skladu sa Zakonom o udruženjima i ovim zakonom.
- (4) Na teritoriji Distrikta, u skladu s aktima granskih sportskih saveza na nivou Bosne i Hercegovine, može se osnovati više granskih sportskih saveza.

Član 17
(Sportski savez Brčko distrikta Bosne i Hercegovine)

- (1) Granski sportski savezi i sportski klubovi koji se nisu udružili u granske sportske saveze, mogu se udružiti u Sportski savez Brčko distrikta Bosne i Hercegovine (u daljnjem tekstu: „Sportski savez“).

- (2) Sportski savez se osniva u skladu sa Zakonom o udruženjima, Zakonom o sportu u Bosni i Hercegovini i ovim zakonom.
- (3) Na teritoriji Distrikta može se osnovati samo jedan Sportski savez.
- (4) Nadležnost Sportskog saveza se utvrđuje osnivačkim aktom, a odnosi da na:
- a) utvrđivanje i ostvarivanje politike promovisanja sporta na području Distrikta;
 - b) promovisanje sporta kod djece i omladine;
 - c) usklađivanje aktivnosti svojih članova;
 - d) objedinjavanje i usklađivanje programa sporta, davanje prijedloga za izradu programa javnih potreba u sportu i briga o njegovom ostvarivanju;
 - e) brigu o vrhunskim sportistima i sudjelovanje u stvaranju uslova za bolju pripremu vrhunskih sportista na međunarodnim sportskim takmičenjima;
 - f) davanje mišljenja na Nacrt strategije iz člana 5 ovog zakona;
 - g) druga pitanja utvrđena osnivačkim aktom.

Član 18 (Udruženja sportske rekreacije)

- (1) Radi zadovoljavanja potreba građana za održavanjem i poboljšanjem zdravlja i psihofizičkih sposobnosti i organizovanja bavljenja vježbanjem i sportskim aktivnostima u slobodno vrijeme mogu se osnovati udruženja za sportske rekreacije.
- (2) Udruženja sportske rekreacije registruju se u Osnovnom sudu, kao udruženja građana u skladu sa Zakonom o udruženjima i ovim zakonom.

Član 19 (Sloboda i samostalnost)

Pravna lica u sportu osnivaju se i organizuju slobodno i samostalna su u ostvarivanju svojih prava i obaveza u skladu s ovim zakonom, Zakonom o udruženjima i Zakonom o preduzećima.

Član 20 (Sticanje svojstva pravnog lica u sportu)

Pravno lice u sportu takav status stiče upisom u registar kod Osnovnog suda.

Član 21 (Radni odnos)

- (1) Pravna lica u sportu mogu zasnovati radni odnos sa sportistima, stručnim radnicima, stručnim i administrativnim osobljem.
- (2) Radni odnos se uređuje ugovorom o radu u skladu sa Zakonom o radu Brčko distrikta Bosne i Hercegovine (u daljnjem tekstu: „Zakon o radu“).
- (3) Zaposleni imaju sva prava i obaveze iz radnog odnosa propisane zakonom iz stava 2 ovog člana i ovim zakonom.

GLAVA III. FIZIČKA LICA U OBLASTI SPORTA

Član 22 (Fizička lica)

Fizička lica u sportu su: sportisti, stručni radnici i sportski radnici.

Član 23 (Sportist)

Sportist se može baviti sportskim aktivnostima amaterski ili profesionalno.

Član 24 (Profesionalni sportist)

- (1) Prava, obaveze i odgovornosti profesionalnih sportista regulišu se u skladu sa zakonom, sportskim pravilima nadležnog granskog sportskog saveza, pravilnikom o radu i ugovorom o radu između sportiste i pravnog lica u sportu.
- (2) Profesionalni sportist zasniva radni odnos s pravnim licem registrovanim za sportsku djelatnost, zaključivanjem ugovora o radu na određeno vrijeme.
- (3) Ugovor iz stava 2 ovog člana potpisuju sportist i lice ovlašteno za zastupanje pravnog lica iz stava 1 ovog člana, a u slučaju da je sportist maloljetno lice bez potpune poslovne sposobnosti, ugovor može punovažno da se zaključi samo uz pismenu saglasnost roditelja, usvojitelja ili staratelja, uz nalaz zdravstvene ustanove kojim je prethodno utvrđena zdravstvena sposobnost tog lica.
- (4) Prilikom zaključivanja ugovora iz stava 2 ovog člana može se posebno ugovoriti davanje naknade sportisti na ime zaključenja ugovora.
- (5) Pravno lice iz stava 1 ovog člana dužno je prije zaključivanja ugovora sportistu obavijestiti o pravima, obavezama i odgovornostima iz stava 1 ovog člana.
- (6) Pravno lice iz stava 1 ovog člana je obavezno da zaključi ugovor s profesionalnim sportistom.

Član 25 (Sportist amater)

Prava, obaveze i odgovornosti sportista amatera uređuju se zakonom, sportskim pravilima granskog sportskog saveza i općim aktima pravnog lica.

Član 26 (Stručna lica osposobljena za rad u sportu)

- (1) Stručni radnici su stručna lica osposobljena za rad u sportu.
- (2) Stručni radnici dužni su ispunjavati sljedeće uslove:
 - a) imaju visoku ili višu školsku spremu iz fizičkog odgoja i sporta ili
 - b) imaju visoku ili višu školsku spremu iz drugih oblasti i licencu za rad u sportu ili
 - c) imaju status vrhunskog sportista s licencom za rad u sportu.

- (3) Školovanje kadrova za rad u fizičkom odgoju i sportu, izdavanje diploma i licenci za rad u sportu obavljaju visokoškolske ustanove.
- (4) Stručno usavršavanje i osposobljavanje u sportu obavljaju visokoškolske ustanove i ustanove registrirane za poslove stručnog usavršavanja i osposobljavanja.

Član 27 (Vrste stručnih poslova)

Stručni poslovi u sportu u smislu ovog zakona su:

- a) planiranje i realizacija sportskih aktivnosti djece i omladine;
- b) planiranje i realizacija sportske obuke;
- c) planiranje i treniranje sportista;
- d) obučavanje građana u sportskim znanjima i vještinama;
- e) planiranje i realizacija sportske rekreacije građana;
- f) dijagnostikovanje i provjera psihofizičkih i motoričkih sposobnosti učesnika;
- g) planiranje i izvođenje korektivne gimnastike;
- h) provođenje pravila u sportu;
- i) informatika u sportu;
- j) menadžment i marketing u sportu;
- k) naučnoistraživačke djelatnosti.

Član 28 (Sportski radnici)

- (1) Sportski radnici su stručna lica koja imaju licence za obavljanje određenih aktivnosti u sportu, a u skladu s pravilima krovnog sportskog saveza.
- (2) Sportski radnici iz stava 1 ovog člana su: sudije, delegati i drugi.

Član 29 (Zabrana diskriminacije)

- (1) Zabranjena je svaka neposredna i posredna diskriminacija sportista u obavljanju sportskih aktivnosti, s obzirom na neko lično svojstvo, spol, status, opredjeljenje ili uvjerenje, uključujući i diskriminaciju profesionalnih sportista i sportista koji to žele da postanu u pogledu zapošljavanja, zarade ili uslova rada.
- (2) Odredbe ugovora između sportiste i pravnog lica u sportu u kojima se utvrdi diskriminacija sportiste su ništave.
- (3) Odredbe sportskih pravila i općih akata pravnog lica u sportu kojima se utvrđuje diskriminacija sportiste se ne primjenjuju.
- (4) Sportisti koji nema validan ugovor s određenim pravnim licem u sportu ne može biti sportskim pravilima uskraćeno pravo zaključivanja ugovora o radu s drugim pravnim licem u sportu, odnosno prelazak u drugo pravno lice u sportu i nastupanje za njega na sportskim takmičenjima u svojstvu profesionalnog sportiste.
- (5) Sportist ima pravo na nadoknadu štete koju pretrpi aktima diskriminacije iz stavova 1, 2, 3 i 4 ovog člana.
- (6) Pravo na nadoknadu štete iz stava 5 ovog člana sportist ostvaruje u skladu sa Zakonom o obligacionim odnosima.

GLAVA IV. PRAVA I OBAVEZE SPORTISTA

Član 30 (Prava sportista)

Sportist ima pravo da:

- a) bude zaštićen od svake vrste duhovnog i fizičkog nasilja, ugrožavanja slobode ljudskog i sportskog dostojanstva;
- b) koristi sportske objekte i opremu, usluge stručnog rada i zdravstvene zaštite u skladu s propisima;
- c) na osnovu slobodno izražene volje učestvuje u selekcijama reprezentacije Bosne i Hercegovine.

Član 31 (Obaveze sportista)

(1) Sportist je obavezan da se pridržava općih i posebnih pravila propisanih ovim zakonom, pravilima pravnog lica u sportu i pravilima međunarodnih sportskih asocijacija.

(2) Sportist je obavezan da:

- a) poštuje norme i pravila sportskog ponašanja;
- b) redovno trenira i učestvuje na takmičenjima;
- c) poštuje sportska pravila, službena lica i gledaoce;
- d) svojim ponašanjem čuva ugled sportskog kolektiva i sredine koju predstavlja;
- e) saraduje sa zdravstvenim ustanovama i posebnim organima koji provjeravaju upotrebu nedozvoljenih stimulativnih sredstava.

Član 32 (Prava i obaveze sportista stranih državljana)

(1) U sportskim takmičenjima u Distriktu mogu učestvovati i sportisti strani državljeni.

(2) Prava i obaveze sportista stranih državljana regulišu se ugovorom s pravnim licima u sportu u skladu s međunarodnim sportskim pravilima.

(3) Sportisti, strani državljeni, dužni su posjedovati dozvolu za rad izdatu od nadležnog organa Distrikta.

GLAVA V. ZDRAVSTVENA ZAŠTITA U SPORTU I ANTIDOPING KONTROLA

Član 33 (Obavezno obavljanje zdravstvenih pregleda)

(1) U sportskim takmičenjima može učestvovati samo lice za koje je utvrđena opća i posebna zdravstvena sposobnost u skladu sa Zakonom o zdravstvenoj zaštiti Brčko distrikta Bosne i Hercegovine.

(2) Obavljanje zdravstvenih pregleda sportista, način vođenja evidencije i medicinske dokumentacije sportista realizuje se u skladu s propisima.

Član 34
(Zabrana dopinga)

- (1) Sportistima i svim učesnicima u sportu zabranjeno je uzimanje nedozvoljenih stimulativnih sredstava, davanje ili podsticanje njihovog korištenja u skladu s pravilima Svjetske antidoping agencije (*WADA*).
- (2) Za praćenje aktivnosti protiv dopinga u sportu nadležna je Agencija za antidoping kontrolu, koja je osnovana Zakonom o sportu Bosne i Hercegovine.

**GLAVA VI. SPORTSKA TAKMIČENJA, SPORTSKE MANIFESTACIJE I
SPORTSKI OBJEKTI**

Član 35
(Cilj sportskih takmičenja i sportskih manifestacija)

Sportska takmičenja i sportske manifestacije organizuju se s ciljem afirmacije i popularizacije sporta i ostvarivanja vrhunskih sportskih rezultata.

Član 36
(Organizacija sportskih takmičenja i sportskih manifestacija)

- (1) Organizovanjem sportskih takmičenja i sportskih manifestacija mogu se baviti, kao organizatori ili suorganizatori, pravna i fizička lica registrovana za obavljanje sportske djelatnosti, u skladu sa zakonom, škola i univerzitet za školski i univerzitetski sport.
- (2) Ukoliko u Distriktu ne postoji pravno i fizičko lice iz stava 1 ovog člana, organizovanje može preuzeti Sportski savez, pod uslovima koji su propisani ovim zakonom.

Član 37
(Dužnosti organizatora)

Organizator sportskog takmičenja i sportske manifestacije (u daljnjem tekstu: „organizator“) je dužan da preduzme mjere koje obezbjeđuju nesmetano i sigurno održavanje sportskih takmičenja i sportskih manifestacija u skladu s ovim i posebnim zakonom.

Član 38
(Suzbijanje nasilja i nedoličnog ponašanja gledalaca na sportskim takmičenjima i sportskim manifestacijama)

- (1) Obaveza organizatora sportskih priredaba je sigurnost održavanja sportskih takmičenja koja podrazumijeva: sigurnost gledalaca, takmičara i drugih učesnika sportskog takmičenja ili sportske priredbe i stvaranje okruženja koje sprečava, suzbija i sankcioniše nedolično ponašanje, nered, te nasilje, prije, za vrijeme i nakon sportskog takmičenja ili sportske priredbe, zaštita gledalaca, zaštite drugih građana i njihove imovine i imovine pravnih lica.
- (2) Način i mjere za sprečavanje i suzbijanje nasilja i nedoličnog ponašanja gledalaca na sportskim takmičenjima i sportskim manifestacijama propisuju se posebnim zakonom.

Član 39
(Sportski objekat)

Uslovi koje mora ispunjavati sportski objekat su:

- a) da ima prostor namijenjen sportskim aktivnostima;
- b) da ima neophodne prateće sadržaje u skladu s propisima;
- c) da ima osiguran pristup objektu za invalidna lica;
- d) da ispunjava uslove za sportske objekte propisane aktima međunarodnih sportskih asocijacija;
- e) da ispunjava standarde propisane zakonima i drugim propisima.

Član 40 (Korištenje sportskih objekata)

- (1) Sportski objekti koriste se prvenstveno za sportske aktivnosti.
- (2) Način i uslovi dodjele na korištenje sportskih objekata u vlasništvu Brčko distrikta Bosne i Hercegovine vrši se u skladu sa Zakonom o javnoj imovini Brčko distrikta BiH.

GLAVA VII. SREDSTVA ZA FINANSIRANJE I NADZOR

Član 41 (Sredstva za finansiranje)

- (1) Sredstva za finansiranje sportskih aktivnosti ostvaruju se:
 - a) od članarina;
 - b) iz budžetskih sredstava Distrikta;
 - c) iz donacija i sponzorstva pravnih i fizičkih lica;
 - d) iz prihoda od zakupnina;
 - e) od igara na sreću;
 - f) iz drugih prihoda.
- (2) Sredstva za finansiranje iz Budžeta Distrikta osiguravaju se u skladu s Programom iz člana 5 ovog zakona, koji se donosi na osnovu Strategije.

Član 42 (Priznanje za sport)

- (1) Za izuzetan doprinos u razvoju sporta, kojim se afirmiše Distrikt, utvrđuje se „priznanje za sport“ kao najviše sportsko priznanje na nivou Distrikta.
- (2) Priznanje za sport se dodjeljuje pravnim i fizičkim licima koja obavljaju sportsku djelatnost.
- (3) Priznanje za sport se može dodijeliti i drugim pravnim i fizičkim licima zaslužnim za razvoj sporta u Distriktu.
- (4) Kriteriji za dodjelu priznanja za sport utvrđuju se podzakonskim aktom koji donosi Vlada Distrikta, na prijedlog šefa Odjeljenja.

Član 43 (Nagrada za vrhunske sportske rezultate)

- (1) Za postignute vrhunske sportske rezultate dodjeljuje se novčana nagrada.
- (2) Kriterije za dodjelu nagrade iz stava 1 ovog člana, iznos nagrade i način dodjeljivanja nagrade utvrđuje Vlada Distrikta.

Član 44 (Nadzor)

- (1) Nadzor nad primjenom ovog zakona vrši Odjeljenje.
- (2) Inspekcijski nadzor nad provođenjem ovog zakona vrši nadležna inspekcija.

GLAVA VIII. KAZNE NE ODREDBE

Član 45 (Kaznene odredbe)

- (1) Novčanom kaznom u iznosu od 2.000,00 KM do 4.000,00 KM kaznit će se za prekršaj pravno lice ako:
 - a) obavlja sportsku djelatnost, a nije registrovano i upisano u registar u skladu s odredbama ovog zakona i Zakona o sportu u BiH (član 9 ovog zakona);
 - b) zaključi ugovor s profesionalnim sportistom suprotno odredbama člana 24 stava 6 ovog zakona;
 - c) obavljanje stručnih poslova u sportu prepusti licima koji za to ne ispunjavaju zakonske uslove (član 26 ovog zakona);
 - d) vrši diskriminaciju sportista (član 29 ovog zakona);
 - e) ne preduzme neophodne mjere s ciljem zaštite sportista u skladu s članom 30 stavom 1 tačkom a) ovog zakona;
 - f) omogući da na sportskom takmičenju učestvuje lice za koje nije utvrđena opća ili posebna zdravstvena sposobnost (član 33 ovog zakona);
 - g) dozvoli sportisti upotrebu doping sredstava suprotno članu 34 stavu 1 ovog zakona;
 - h) organizuje sportska takmičenja i sportske manifestacije, a da za to ne ispunjava uslove propisane ovim zakonom i Zakonom o sportu u BiH (član 36 ovog zakona);
 - i) ne preduzme mjere koje obezbjeđuju nesmetano i sigurno održavanje sportskih takmičenja i sportskih manifestacija (član 37 ovog zakona);
 - j) ne izvrši obaveze iz člana 38 ovog zakona;
 - k) organizuje sportsku manifestaciju u objektu koji ne ispunjava propisane uslove (član 39 ovog zakona).
- (2) Za prekršaj iz stava 1 ovog člana kaznit će se i odgovorno lice u pravnom licu novčanom kaznom od 1.000,00 KM do 2.000,00 KM.

Član 46 (Novčane kazne za fizička lica)

Novčanom kaznom od 500,00 KM do 1.500,00 KM za prekršaje iz stava 1 tački e), f), g) i h) ovog člana kaznit će se fizičko lice.

DIO TREĆI – PRELAZNE I ZAVRŠNE ODREDBE

Član 47 (Usklađivanje i donošenje podzakonskih akata)

- (1) Vlada Distrikta je dužna da donese Strategiju iz člana 5 ovog zakona, u roku od jedne godine od dana stupanja na snagu ovog zakona.
- (2) Vlada Distrikta je dužna da donese podzakonski akt iz člana 41 ovog zakona u roku od šest mjeseci od dana stupanja na snagu ovog zakona.

Član 48
(Usklađivanje akata)

Pravna lica u sportu dužna su uskladiti svoje opće akte s odredbama ovog zakona u roku od šest mjeseci od dana stupanja na snagu ovog zakona.

Član 49
(Stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-425/11
Brčko, 30. juna 2011. godine

PREDSJEDNIK
SKUPŠTINE BRČKO DISTRIKTA BiH

Esad Atić